


見素林公文集



見素集卷之二十六

後學黃佐校正
孫男及祖重梓

祭文

蘄庠祠先祖敬齋教授

於赫吾祖嗣徽前聞金精玉潔石介蘭薰繪句摘詞蛟騰
海立命鄉進秀青紫芥拾命與時仇僅弟子師枏櫨宗楠
成室異施爍爍文光星流電激紀德祀賢靈祠孔飾俊襲
庠庇庶訪克負矢心敢負白日青天真風聿懷浮榮載謝
過奠一觴以告地下

鄉老祈雨

維弘治十二年歲在巳未八月戊子朔越次日巳丑鄉義等官并耆老等謹具酒果合誠懇禱于興化府風雲雷雨山川社稷城隍之神曰嗚呼前歲風拔木發屋去歲水溢頽垣人沒山崩沙壅田皆百餘年未有祗今中產之家上雨旁風無所爲覆庇厥亦旣酷矣今歲麥不熟自夏至秋又復不雨禾稼焦死人無水可食災沴之後豈容有今而又甚者則非官不職則某等齒鄉人無以示風範用表頽俗天降之咎歟罰則奚諉然亦不謂更無一善者良者與虫蠶無罪之細民無亦可憫歟 天以生物爲心神

相天以成人以惠澤人以長 王國世血食茲土者也卽不某等存念無善者良者與無罪之細民留意耶今某等協誠循省革故而効新爲郡衆請命以祈甘澍神其相天亟雨下土使垂盡之禾萬分一得生民之望亦神之麻嗚呼厥亦惟神之責謹告

祭丁玉夫

嗚呼天降割吾玉夫其無旣慘乎相古之儒弗罹凶禍蓋有之未有身若家是以烈也公無摘言無踈步忠純孝敬績外而粹中可以質天地而通神明其事天也至矣頓撼斥逐偃蹇艱屯若太阿之煨淬以益堅巨石屹然日炙雨

潤而中無所入竟收用世之利其信之天亦極矣遠倅未幾三原居軸收之近郡再上提學公以易洞計解官服喪久之即家拜興國守又以母夫人計解官服喪倪文毅居軸又即家拜南京儀曹郎未三月又超拜憲貳視學廣南方是時章蘭溪亦以僉臬委老二十有五年拔起祭酒盛事並聞善流生氣我

聖天子崇儒右道于斯益光相

臣弼成光大之業與文毅銓譽于斯益起嗚呼公器渾完涵養深以熟儒之効其大行於今無難也其詎知有是哉吾道誠衰而天者誠無意耶慈母抱愛子道什而斃謂若是憇而故委之非人情然則意外之虞天者亦不能周護

而曲庇予獨過公信天之過也前舟先覆事已可知猶執我之定而諒天之必信前之勇曷若卻之之智也亦胡損胡負胡枉已而不爲耶嗚呼其信天之過也氣息久盡冠襟自如其方寸不亂亦審矣非得之素能之乎嗚呼公之禍偶然邪抑亦有大關係者公同年中寡少邂逅數語決知非近世人公亦矐矐及我普安之行抵足江舟宿留而別其後兩及公之門居益敞壞幾於不可入抑不知古之人桑樞蓬戶環堵蕭然而絃歌屢空者於今何如也公之詣極蓋已聖學疆畛升諸儒之堂而窺其奧天假以壽草廬魯齋之室不足深也嗚呼今則亡矣秉彝人心郡有賢

守固將謀公之喪而邨公之後况有吾遠庵豈直宗師東
野之地而已哉生自弗邨胡後之思聽之天而已矣抑吾
黨之賢之所自盡也予涕之從非公之私爲天下慟而已
溺者不弔吾能公乎已耶嗚呼哀哉尚饗

祭夏通政廷章

嗚呼昔公殖庵及我三人斯文氣義首尾一身我厠外臺
殖庵內授公叅納言仍南之舊十年垂隔如叅如商神交
夢悟地短心長我廉湖憲寔公故里書不及私兩心如水
我病得告公書猶勤朱墨帑筆歲致月分我起南臺公湘
省墓諸子伯我温存戀故公旣來只臨昏過予握手交拜

喜極而悲更燭話言不兩月許公進馬卿開寺江浦聲迹
猶近我巡江西解官內艱重隔雲泥後不再年公轉通政
乎久忌忘物殊價定岩廊林壑分局而居丘烟水樹吾愛
吾廬委重二公股肱心膂爲國著龜爲時霖雨蓋臣碩輔
並武後先謂奄朝露乃厄中年公襲相器渾涵遂謹不激
不隨叔度千頃有體有用有德有容有技若已玄齡之風
夏自太師祿賜稠疊迨我清卿班聯寵接我公入仕庶取
廣施家大口衆竟落難支貴而能貧短衣敝襖對客兩豆
名曰學我我起韋布公世金緋各安限分緣學奚爲今人
古行亦孰如公自家刑國終始孝忠柳灣津橋月夕繾綣

見素集卷之五
假山斷栢斯情可見嗚呼自頃得計尚無月日思公哭公
我心千億一字一泪落公斯文山號海泣風雨晝昏嗚呼
哀哉尚饗

祭宋氏妹

維正德二年丁卯八月某日宋氏妹卒八日兄見素再以
酒肉俛而奠之嗚呼哀哉分合萍寄幽明紙隔形蛻息隕
彭殤奚擇父母生我凡八弟昆我老未死四弟偕存不幸
促齡盡嬰諸妹吳方世早汝復斯背事好難牢境順易乖
汝父汝兄特百茲懷咨爾令妹少安閨儀淑閒靜晦善恐
人知維昔婿孤性分于習汝動以誠波澄風息維昔宋初

貲計涼薄汝重拮据粒累絲縮兩心二紀昕夕苦辛謂家
僅起而病在身黽勉從事不藥不肉日支月撐竟守床褥
察脉視形知汝病亟歸復汝父未敢言實事曷能隱死曷
能作生者甚虞獨汝乎哭一子一女割裂兩孤孰是教語
孰是携扶孰是摩撫以恤寒饑在目千感入門孔悲戚戚
長風黯黯澹雲泡影幻夢予話曷聞存沒未違忍情斯奠
神渙神遊吾母相見嗚呼哀哉尚饗

祭黃叔登

嗚呼謂叔登玉立山勁年二十八病數日死耶予友汝父
西溪善前二十有二年哭汝父京師視歛視棺予任焉孰

謂今日又哭汝視歛視棺如汝父時也哀哉傷也汝父始病即以後事托我時謂西溪直方剛亮即不致有顯位不應年四十六死既竟死又謂宜厚償必叔登也叔登幼羸弱既長脩矧予私喜既又有子又私喜每過予視其睛若定叩其命庚生於子四柱火過盛又運值寅卯丙丁歲又值焉謂若過重又私憂然予素不精二術謂不信也予出再歸汝狀貌豐偉酷如汝父又疑肥太早然謂西溪之後必昌無疑也前數日方拜我床下求汝母墓銘卜以是月終襄事予忙奪且病閔汝應汝使來致謝乃知有喉疾予往視謂宜多致醫汝則閒適若不經意不自意若是之奇

再視則亟不可治徬徨告訣屬予與吾子達以後事出其母妻子羅拜斯時斯狀可言哉可言哉哀哉傷也汝父死汝方七歲汝之死汝之子亦方七歲然汝父有父母兄弟妻又中年皆無可憾今汝無父母兄弟僅一老病之生母妻又年少雖素賢烈識字算其支幾何汝之慘視爾父萬萬倍耳嗚呼哀哉天也黃氏世積德有何罪戾西溪素積德有何罪戾汝素醇謹有何罪戾即天之爽佑豈宜戾罰又若是酷以慘耶斯神理之不可憑求之天而不可得然汝子決不凡汝妻有女丈人之風決能撫汝孤弱保汝家不落無疑汝諸父諸兄諸姻友又皆可托孰肯負背汝子

見素集卷之三十六
一日不死汝言一日存予將愧市道之交轉眼若不相識
况有其子若孫者哉予言不信汝觀斯文嗚呼哀哉尚饗
祭白沙陳先生

晚學見素子林俊謹具肴醴托鄉友林君舜舉致祭于老
友石翁陳先生有道之祠嗚呼先生澄澹開閩韻致極高
自游康齋而心學正友一峰而節槩明友定山而詩學又
大進勾押烟霞陶寫風月堯夫之襟度識量高洪才慮深
遠有道之風致而春從懿醇軒特嶄絕則又叔度之雅與
子陵之風焉先生非隱者也元亮八十月縣令晦翁四十
日朝官先生蓋無一日焉處士名高而用多不副先生蓋

未嘗試焉彭從吾首薦朱柳揚再薦不揆小子默致力其
間然所以處先生者誠情耶翰林之授我 憲宗之特

見云耳木高風搖行高人毀然而攻洛者蜀人也先生則
鄉人焉何心哉我 孝宗恭默思賢言者恒及焉而彼

人方據要使 清朝缺審像徵聘之盛舉彼人死先生

老且病無復周公夢矣先生雖不用於時而道風義槩起
鄉人而歆動天下廣之風所以大異於疇昔者誰之功天
下之士稍知自立而不隨風以靡者又誰之力歟嗚呼東
漢名節之士固亦有賴于此者况先生重非其儔耶使游
濂洛關閩得其微言與旨侶群哲會數聖以肩項四子無

疑也某自京師幸親光霽慨歲月之未違而悟言之不可
復再今已矣墓草幾綠一觴未致托心語於便鴻寄世風
於遠涕嗚呼哀哉浩浩南海截截匡山張陸儼在公神其
間嗚呼哀哉尚饗

祭檢討子道族丈

嗚呼期耄何人台鼎何位公兩失之亦又何義予博觀於
儒碩孰如公其獨歸鼓晉鄙於同風挽蘓湖而並轡顧好
脩以殞靈噫斯文之誠墜當成化之甲辰予詔獄之肇寘
辱發憤以如狂挺獨力於時忌迨蒙原於左官忍割貧而
腆遺秘臨分於贈言泪盈盈而把臂比署復於留司歡騰

躍以忘寐溪節使於南征勞尺書之遙致既之公以母憂
卧廬予亦便道歸侍孚夙抱於既知托話言於一戲篤久
要於忘年領教墨於文字悵予行之若迷而公益醇以懿
愍從吾以喪予暨介庵之謝事懷結惛以填膺遂毒疽而
發背盖公赤心寘人好賢出自視官如家憂國誠至在太
學幾三十年而生徒迄無異議風憲之秩預推翰苑之負
外置緬入覲於天顏勞二詩之先詒出細語於隱憂
分半榻于旅寄羗余解紱廻輶公亦浩然歸志勤遠緘以
告期胡一疾而遽弗治負宿諾於經丘竟訣言於遺志嗟
絕命於終天恫淪精於下地盼冊旌於陸離幾失聲於哭

身繫集卷之三十一
次顏玉樹於孔傷恒遺音於弗嗣泄予衷之糾纏固非在
夫椒楮與酒載嗚呼哀哉尚饗

祭黃未軒

嗚呼未軒胡不百年鍾發淑異茲山茲川德宇春融文局
爾雅懿躅詞垣物厨器冶悻誠中慣有直如弦買燈疏入
湘水南遷旣玦而環 憲廟仁聖復官留臺徐引而近
平反績茂右秩明揚公病遂告振衣層岡 孝廟嗣服
起僉臬憲風紀士範副聞愜見脂韋叔尚任獨無同磽磽
缺裂樹高多風公賦歸來渚雲溪雨猶勤述作手筆燕許
邁邁時運間身隱憂少陵龍川公也其儔白衣冠典刑

諸老遊息縷斷烟休迹掃踈松短髮晤語無期俛仰疇昔
隕越斯悲嗚呼哀哉尚饗

祭鄭司徒東園

嗚呼維嶽孕靈終鮮斯具維才用世終鮮斯遇公邑專秀
在郡特隆如氣四備而日方中雲漢爲章月流星發侯儒
侯吏駿聲秩秩昔在 英宗又在 憲宗又在

孝宗竒收顯叙百十臣同職勞弗來立孤樹敵青蠅容黠
吠聲以寂麟鳳維侶魚鳥移神連䟽十九以乞斯身

帝篤表著鏡誠命可晉秩昇傳優我元老 皇上嗣服

覃恩林樊麟衣玉帶海國僅觀膺膺廣原下有雲水樂胥

身集卷之五
九
視後有踵芳美不杖不藥重致我詩居然謂訣三復而疑
不遠登堂公步而出把臂入內引觀歛服踈燈細雨坐話
移時收屬元化曾是惜之氣完際盛福壽考終後先鄉哲
繫孰爲同俊忝新媿相知皓首隕獲斯文豆炙盃酒嗚呼
哀哉尚饗

祭廖約齋憲副

嗚呼惟公質木近道重厚少文山藏海納涇渭中分獨醒
皆醉孤妍群醜不相爲謀爲敵已久口吹面借有僞有真
謂必公異則知其人公握刑章中外二紀直方子良名無
虛士肅肅外臺上有殊階長空鳥倦公賦歸來踈菊長松
閒雲野水謂樂無憂乃甚在位典刑斯謝公不百年青峰
吊鶴古樹寒烟社不尋盟葬不視穴素車焚臨斯情隕越
嗚呼哀哉尚饗

祭蘓守林師召

嗚呼辛丑之歲識子釋褐問姓情投水支木末子令吾莆
亟以憂去頌聲流聞家人婦女後二十載如參如商姑蘓
邂逅話短心長我厭奔驟泉石自老德音南來聽之愈好
我有愛弟教事治屬謬荷特推謂傳家學凡今市道紆久
險艱奚敢獨信元季異觀子有素抱不亟不徐謂宜致遠
以疾其驅在辰歲厄庚子日斜期不予副飲恨長嗟才高

命蹟由古多然臨風閣泪忍默奚言嗚呼哀哉尚饗

謝晴

二氣良能幽明表裏休咎由人和薰爭致兵烈猶火陰慘
寔深神抱湮鬱雲淒雨露師老絕儲負茲怏怏豈曰一念
有應如響神寔念民恫瘝若身贊厥彌難用宣聖仁祥風
發發秋日杲杲天宇開張翳迹如掃體薦壇下有報有祈
一晴之借寇盡爲期尚饗

祭楊月湖公

嗚呼洛陽紫陽識者皆推論其大中韋齋之世有吾月湖
其有所受也公置身繩柙能鉅而養充方殿大郡賢問秩

秩然以起即理柴桑公之迹固不在督郵而鎮雅訓恬身
任焉老成持重典刑鄉國者幾三十年孝友肅睦伊誰之
型範退讓恂恂伊誰之風致公之德福取左券不遺矣重
我月湖潛默領悟上友千古固將演洛閩之傳所以立長
世于公者又將不直身世耄期之壽而已也俊辱月湖道
義友益嘒形逃而迹謝比公計而始知王事程期宵日斯
征俚文叙哀有百斯情嗚呼哀哉尚饗

祭教授祖生祠

維正德庚午二月二十有二日戊申孝孫俊重過蘄陽謹
具牲醴祭告于吾祖致仕教授敬齋先生之祠曰嗚呼祖

身素集卷之三十一
與孫固相屬也俗韻寡諧世關長謝甫去斬三千有餘里
一尊祠下徒有其夢亦何有以親致之今耶方青丘而縱
浪忽黃紙以到門付孫以金革之事不敢不起也西川吾
邵州祖抗劉闢之地今之事任又重不同者孫其敢不自
盡耶分
上憂揚先烈載歸我林樊祖其相只謹告
為官兵疫禱

正德五年歲在庚午越四月朔日行軍都察院右副都御
史林 謹具牲酒致祭于撫內風雲雷雨山川社稷城隍
之神曰賞罰大柄禍福大防幽明翊運綱紀一方潢池弄
兵東川騷驛吏冒民痼繫神攸責旣慘而熾上厪 宸憂

陳師鞠旅誓殲乃讐如虎如貔我兵赴赴一鼓成擒摧枯
拉朽犬羊褫魄烽埃餘紅距躍戡亂式奏膚公戰血猶腥
重罹酷疫毒穢薰蒸僵尸枕籍遊魂斷息哀此徤兒秦越
繫戀寧神弗思我藥我厝我憂若禱惟神悔禍機幹元造
祥風先驅凍雨洒塵瘳蘓什起勃勃為春薦芳陳詞于役
請命揚休宣靈神允時慶尚饗

祭病死征夫

行軍都御史林 遣西陽頭目李庠與病故從征土兵酒
肉告之曰藍賊搆難干紀亂常汝役征事我武用張方切
汝念乃疫而亡魄安淺土魂返故鄉有酒有俎亦有佳梁

鳴呼其來饗

巴縣祈雨

紅巾扇禍干紀亂常奉命于征遠蒞茲土燎原之焰雖稍戢於曩時而乞降依違掠食者雜出載議撫剿以仰副明詔維時官兵四集營壘萬竈疫厲易作况雨澤告慳恐有秋無望巴人喧騰謂麥盡于盜尚倚秋穫奚生弗辰于旱斯酷夫盜與疫與旱皆病民者而神罔聞知無過耶先王之典能禦災捍患有功德於民者祀祀祀民也今民病於盜病於疫又病於旱是雖官吏貪殘俗薄惡刑政罔協于中者之咎神無與有責耶神其庇國右民相厥戎事茲

元兇之鑿而禡其魄俾降者並生否則盡戮無噍類廓清厲鬼俾我軍皆勿藥驅逐豐隆霑膏澤紆焦枯於數千百里外俾困庾穰穰流離蘓復神之庥其亦分有餘責謹告

謝雨

俗落政靡神理弗右既盜既旱天速之咎流離窘迫民斯爲極矣內罔定志而外罔定居非殍則盜不可以已矣待罪西征技窮當局鞠躬秉虔祇告壇下越二日雨信宿又兩苗復蘓兵亦尋有凱報慰望伊始畢功允期神之庥亦予小子之祝其臨饗

祭吳僉事景

生死大分節義大閑孰是不朽天地之間稽血巖頭張齒
顏舌日星亭亭于茲永烈陸馬蜀川盜誰禍始通巴尚關
江津猝起子抱竒氣雪恥除兇躍馬按劍萬夫之雄倒海
狂瀾一柱奚力卒潰城陷手刃三賊銛鋒兩至以身代民
言訣老母黑風酸辛子孝且仁子忠甚武亡以求存掀揭
千古嗚呼哀哉尚饗

祭汪洋指揮陣亡

天降亂于三川東而北則藍東而南則又曹螳臂當轍魚
遊釜而假息固已寘肉于杙矣爾壯且武奮而從征嘗屢
殪魁酋搗巢穴以顯樹有勲績予時惟汝之竒汝亦副知

遇以仰答世恩矣江津馬鞍之戰辛未正月二日也執訊
獲醜破其營擒戮百九十有餘級亦良偉矣乘銳而深以
逢其伏而汝以戰死過進矣然視彼懦夫奉頭鼠竄生如
汝死耶嗚呼天厭亂宜有期生死大分抑斯汝武官之所
耶有餘榮矣殮汝棺汝謀汝葬之事而祭以文鑒之其來
饗

達縣謝雨

天厭禍兩川風雨時若而歲以稔告元凶悉擒亂用弭亦
幾于盡矣惟茲七月亢陽縱焰土毛如焚居室若甑熟征
戍暵以道死謹齋沐省循走過壇下是日申大雨酉雨亥

又大兩至于明。長風扇煩去，潦流惡枯回。而病起天宇，澄肅川嶽。於是乎改觀矣。某數小子，敢貪天功，神相天惠，民偶值之也。薦馨選肥，仰答神貺。猶是殘醜，猶漏天誅。蠱尾蝮牙，上干宸慮。神其懋揚，英武盪殪。妖類亟贊，庸公閔綏。我元元某，尚脩有報事尚饗。

祭魏少司寇仲禮

昔在留臺，三司並峙。公重如山，其門如水。跡孤寡合，君子無朋。帝曰：惟臣作朕股肱，入少司寇，實便騰翥。有躋若逢，遽賦歸去。連絡黨禍，弗震弗驚。人曰：神蟠既哲，且明望八。委運壽亦孔多，落落故老傷如之。何嗚呼哀哉，尚饗。

見素集卷之二十七

祭文

祭邵州

惟王惠八手，或生於夏。九月，丙寅朔，越十有七日壬午。

後學黃佐校正
孫男及祖重梓

見素集卷之二十六

卷之三十六

祭魏少司寇仲禮

昔在留學... 無朋... 右逢... 望八... 祭魏少司寇仲禮... 女... 孤寡合... 子... 神... 既... 且... 明... 嗚呼哀哉尚...

見素集卷之二十七

後學黃佐校正
孫男及祖重梓

祭文

祭邵州

維正德八年歲在癸酉九月丙寅朔越十有七日壬午二十二世孫都察院右都御史俊承祖父先都御史宗先都御史朝之志構我 始祖唐忠臣邵州刺史十九府君之祠中祀公配我 始祖妣何氏祔以二評事六宣義十四奉議二十七評事四府君昭穆之位系我五六居士而下

身著集卷之三十一
四房宗先官序名配以萃渙棲靈是日謹具牲帛酒饌奉安神主曰公起人文連爽破荒稜稜義聲運幹綱常群翳衆啾星鳳快覩世始君臣閩始鄒魯儒林事迹首錄特書鳳崗千仞生氣凜如讓舍軍庠祠亦並去墨食孔艱俎豆何處逝波歲月心久力難景光流射星斗夜寒奕奕新廟神用吉告應會舉曠畢情祖考新廟既落奉安公神式時瞻對于祀于禋既多受祉祗續維似維德維文維公孫子尚饗

遣祭從征指揮王英

落落難合孰晦而章之溷溷爲同孰怯而勇之野宿久次孰神而歸之師捷身死孰速而奪之伏枕啓衾孰藥而殯之旅襯孤魂孰檄而返之生念汝勞死惠汝酒食汝受而歆之尚饗

祭始祖唐忠臣邵州刺史祝文

惟公文炳日星忠貫金石鄒魯東南開先求式祀有鄉賢傳有國史重此雲仍敢稽報事茲惟冬至謹以牲爵庶羞庸申祗薦以二評事六宣義十四奉議二十七評事暨林氏宗先祔食尚饗

祭豫齋中丞

粵在京師二黃三林兩姓兄弟五友一心公在班行儀觀

都偉尺寸殿庭萬目駸駸秀朗清發玉色金聲温恭慎密
德宇天成虎口餘生魚頭舊直受知 累朝進陟雄職三
省經略胸中甲兵綏撫鎮定居然長城繩墨糾違賢聲章
播方引入近而以病告悼念昔遊晨星落落猶陪杖履風
泉雲壑收靈川嶽人琴俱亡拊膺割裂世道伊傷公同邵
州院銜並峙堅壯先淪朽裂何恃楚楚蘭玉先後嗣芳公
世之短公澤之長紫峰練辰韞紉云發觴酒寫勤以告長
訣嗚呼哀哉尚饗

祭儲殖庵少宰

嗚呼元醇應會竒碩命世譬之麟鳳有不一二嗟嗟殖庵

粹德完名述作備體斯文典刑公始自玉視我它山不泐
旬月駕不可攀葩藻天成一機萬有細入毫毛匠哲袖手
光怪騰發猶驚鬼神前驅韋柳賈馬後塵情話綢繆我心
我腹意往形忘不隔膏膜涼雨踈燈柳灣抵足言碩孟韓
雲龍相逐嶽嶽士望為瞻兩京由公屈伸人卜太平二十
七年中間一面別易會難光景流電日者橫禍士夫載罹
孰謂狡童吾汝亦知三尺神明人理可信公老尤竒壁立
萬仞海隅天上言念衰殘風雨酸切廢寢輟餐小大俱年
物歸于盡木折山頽文昌夜隕南來凶問不有月日且哭
且疑謂虛謂實嗚呼殖庵其已矣夫一短兮萬長具完兮

獨缺後蓋壞兮常留不物腐兮烟滅杳杳兮夢尋絕四海
兮誰知音素車白馬兮山遙水深寄一樽與萬恨兮月黑
晝沉風淒冷兮泪盈襟嗚呼殖庵言長而意未盡如吾友
何哉嗚呼哀哉尚饗

祭鄭元美郡丞

曰昔先公及公不鄙數世室比分投姻連友契讐經軌物
若有符違論難開解與道爲歸散帚千金楚和缺遇銳鈍
易酬我乃非據丞叅三郡有鴻厥聲孰宜其滯而沮其成
訪落起廢曰有後命出雲無心柴桑再請深山窮谷霞赤
兩班有要仙流烟水之間公病踰載不涉床褥危論豪談

抵掌頓足日者存問頗覺衰羸留情藥物以杖自隨天地
一寄生滅彈指物始必終彭喬何恃龜傳組襲有子有孫
斯懷未割脫垢離氛有訣斯文聲吞淚漬觴豆馨冽以飲
以食嗚呼哀哉尚饗

祭困庵

嗚呼困庵子之學可遠至才可大施而器可以顯受其皆
不然意者將優之以山水之福收桑榆而壽金石其又不
然吾不知其指也子一門父子兄弟伯姪駢首青緋中丞
大顯其後仍襲中外又顯地美者力分水支折多而流弗
盡駛物理人事意者其然歟予與子兄弟自同筆硯及今

五十年道相師而意獨至中丞世早猶子足恃予簡出歲
 不數東東必及子之門子來南亦復過我遴幽搜勝遡高
 寒而臨遠碧非子不樂也雲庄寄傲子多以疾辭弗赴予
 謂子自愛太殷然體果重行步果難年後予而先老予戲
 曰子熟矣蓋箴之也嗚呼孰謂其止是耶子始病弗及知
 有告者曰誠病誠病予亟視則証已亟又視又亟至竟弗
 治嗚呼子嫁娶俱畢孫亦長子無欠事予懸寄兩幼子猶
 未抱孫予之所短子之所長子目可以瞑可以無悲矣為
 子之故廢寢輟餐泪油油落枕上子兄弟俱去予其益孤
 矣竟之何哉一樽子別飲不飲未可知而臂不可把言笑

不可聞所見者僅帟上之容兒孫之踊之哭之哀而已嗚
 呼痛矣尚饗

祭抱獨郭先生

嗚呼渾朴既散佻巧奚觀吁嗟先生削偽反利文成在中
 玄壁紫貝獨月晴峰蕭散物外知白守黑近不偏同舞雩
 觴詠有點之風詞譜藝林微言雅調意觸神迎會玄領要
 散殊有象肢臂猶身百蚕一葉官久而貧棲鳥舊林搜竒
 選勝星霜十移一疾以盡亭育禪代委心奚疑老成之逝
 世道之悲吁嗟先生鄉國輕重白日晝冥鬼驕狐縱某賤
 兄弟少及師門以督以教開蒙指昏浮窳翔酬不龜澣統

身集卷之三十一
及尾師還叨陪几杖雅俗獨鎮猶參典刑白首相失仰天
失聲嗚呼紙上兮丰神夢中兮言笑長暮兮何晨徠霜號
兮鶴夜叫嗚呼哀哉尚饗

祭黃大參伯望

嗚呼士貴乎真學貴識臨事貴斷才貴實用而操之有常
世道胥賴焉子重厚少文沉永內定脂詞蠟貌無有也精
警識治絕浮瑣論難徐折一言肯綮開脫臨人出政守軌
則以終身如善藥然利去病堅木優於任載自計曹及守
及參大政華問播流肇盜區也至則歛戢承其後無及焉
武昌數月茂著廉平所見無及焉廣藩風宣惠溢所聞又

無及焉右轄累推固將有大受僅以往者之形吠猶騰厥
聲白日青天其誰則信之而決策東邁以從我雲庄子之
道則然也孰謂抵潮而病以卒耶嗚呼子之力可當大事
可一面可許友以死鄉國予畏三數人間耳其竟是耶薄
田僅足口食老屋低短風雨未足庇吾流物品容蓋棺定
耶瞡瞡猶童翁翁猶賤子自有至者亦奚賴彼哉嗚呼易
庵予無復子一臂矣孰重予之哀之甚也世道慟而已矣
白日兮晝沉仰天兮失聲靈風先驅兮凍雨灑塵魂來兮
母驚對兩孤兮餘情嗚呼哀哉尚饗

祭楊石齋乃尊

嗚呼川嶽完醇有厚有清有與其一亦足自名如閔四陳
如井四李如眉三蘓鄉國並峙文聲道望曠視無前公舉
赤幟凝然中堅公起甲科子已先第狀首解魁嗣無虛歲
伯氏元弼仲氏上卿謝蘭竇桂階祀前盈少師太師麟袍
玉帶錦水榆鄉陶然物外顯允石齋作時阿衡運猶開德
佐理太平 帝念師臣是父是子內法大官几杖之賜
自公之疾䟽輒論思 帝曰第行朕以醫隨自公計聞
當宁悼惜曰惟舊學朕不汝釋血誠披握竟動 宸衷
弼亮孝理而以奔從卿護其行 朝速其計存沒有耀殊
恩異數關西載德有業有年以植以漑蔚焉叅天嗚呼公

之責償造物其厚其清其固如是哉某辱橋梓連寀並登
通家情義豈曰友朋于役西川言念傾寫臂未及交酬我
青野會合斯難萍水餘臆設位緘詞斯夕何夕嗚呼哀哉
尚饗

祭東所

嗚呼東所命也夫孰安其處孰異其行胡赴胡謝以止以
鳴咎搜尤於殊遇副遂初之素盟還菊松於陶徑曾染指
於鄭羨兩楹之夢竟訣斯生嗚呼公壯而武公亮而清學
惟自得性乃天成稜稜直氣炯炯元精寧遠區而窘步甘
丘壑以陶情嗣音一老樹幟群英方將侶鷺湖而訪嶽麓

身集卷之三十一
招栗里而吊屈平分嚴陵之席而抗堯夫之衡彼鸚翼螳
臂蚩聲蚩燭曷足繫其重輕而死生之際乃若宿計而預
營名無虛士信矣夫俊幸及公未交一臂感一氣之相投
辱尺書於數致詩篇和荅千里郵置不腆之文又辱公序
假歲月於星纏合參辰於一奠嗚呼伐木絕響白頭如新
孤懷遠韻乃復吾珍忽來凶問月久乃真山頽木折物脆
人陳嘅屋梁於落月寄一想於丰神窮天之翰截海之麟
附文一奠有涕盈巾嗚呼東所竟不及見矣其何情嗚呼
哀哉尚饗

祭太師涯翁李文正公

正德丙子冬之月吾 師涯翁文正公李先生計至俊爲
位雲庄以哭計再至又連哭附小奠我師先生之靈曰嗚
呼我國家河洛効靈人文啓 聖鉅儒宿學高詞大策

步典墳而追風雅固已岡連峰出矣巍然而特起者洪武
時則潛溪翁未樂而後則楊文貞公成化及今文之盛又
極矣吾 師文正公又特起其時渾厚紆徐無刻深峭絕
之態而油然其光蒼然其色抑揚正變如迴風立海倏焉
砥平良將勅敵優游而暇豫又如長江大河瀄之不盈支
之千百派無見其縮先生於文蓋深矣書兼六體真行草
篆點畫韻致宗秦晉而參以獨得之妙先生之於藝亦精

身素集卷之三十一
以習夫粹衷完質離垢而絕瑕含洪邃永居以益晦歛焉
其若無先生於道德蓋亦純以備矣少以神童宣入宮荷
有殊錫弱冠第甲科不出館職者五十年在宥密者二十
餘年陟元樞預顧命既致其政猶給祿終其身歲時勞問
計上輟視朝卹恩加于數等先生之遇竒且極哀榮且
至矣仁焉春義焉秋生生落落而莫知誰之爲經猷注措
顏之所謂大勇者也俊承誤收迹䟽心往僅侍先生者數
四丙辰入覲先生曰見素太迂吾師生何嫌脩一刺門下
以去先生時遺俊書無敢荅解元柄詩來我雲庄謹和付
達子來上先生語哽揮泪者一再始及成禮嗣是和篇往

還達還先生出詩三十首命和和上先生病且甚猶命扶
強讀泪油油曰平生見素知己詩其未訣矣嗚呼謂俊之
倨簡荷先生知愛之深如是耶其忍聞其忍言一尊附奠
涕與神來心長語塞其惡足寄耶嗚呼其已矣尚饗

祭大司馬劉東山

曰聖作物覩雲風景從
憲廟出震我公是逢首讀中
秘載署司馬物品一時有風斯下同升意屬懇以驟辭出
叅大政乃正藩司懿懿中丞經紀河決奔流爲馴宣防爽
烈司徒陟佐引疾祈哀
孝廟遂公箕穎初懷鷗石猶
涼薦書聯絡
帝曰汝行殿我南服三邊震蕩特付本

兵溫國入內人卜泰平
孝廟勵精圖惟化理寄任老
成朝多君子魚水之會一日三宣股肱心腹禮絕隨肩
孝廟升遐公慟幾殞力乞遺骸東山待盡虫妖鬼燐水簸
岡燔烟焰漲黑白晝爲昏坎止流行徐值其定翳收日明
天子仁聖公旣西下我亦東還過從一宿別泪斑斑青野
回翔交情滿帟床褥何時竟乃罷市繫人無祿喪我宗臣
謂誠可贖言百其身一日公存一日元氣木折山頽世風
委地嗚呼木落兮山秋悵跡孤兮誰留蛇蟠兮鳥叫下夕
陽兮江悠悠嗚呼哀哉尚饗

祭陳如賓孝廉

正德丙子臘月之望之旣見素子林俊之友陳孝廉如賓
卒哭之哀而過焉積五日始強成文具酒饌率弟姪若子
哭而奠之曰嗚呼昔賢命世未嘗不推之於天吾於如賓
即未謂河嶽完靈要亦東南元氣至清之會矣造養深純
持行嚴苦斗室危坐以靜見天地之心古聖賢之氣象而
澄若止水重若喬嶽益若春陽若冰雪之芳潔孤風遠操
爲世道甚賴昔伊川門人竟無能傳其學子遊白沙旬日
爾爾矣而酷信不移其敏若不逮其堅苦又殆若過之不
規規文字述作以濫附四儒之傳然使生夫子時得夫子
爲之依歸當列冉閔之次其尊德性其子靜下耶棄官爲

身素集卷之二十一
養一十有三年母疾亦疾逝而亦竟以逝其純孝矣夫無
他兄弟一弱息不假五十八竟終斯子之至完獨欠至厚
而亦以薄斯天也易簣無一新衣官爲具棺予爲之具殮
䟽戚賤良遠邇下及穉弱與其女婦識不識無不爲之酸
痛天日爲慘黑子之道足信矣子謬兄事我每過我群疑
開解宿疾頓脫以去子其我著蔡我藥石矣餘日末路由
今其復有子耶叔風盡瀉猶幸子立赤幟指揮群迷抗頽
流之一柱由今其不復可支矣嗚呼吾世道慟也哭吾私
而已哉尚饗

祭困齋

嗚呼先生方格邃猶峻聲鏗韻上風長征九宇一暖決起
楊翅竟落誰收雲居水眠天脫籠囚閒福伊穰脩景奄促
賚是長餘優其後贖輜車晨啓並玉香山玄堂漫漫大化
公還嗚呼哀哉尚饗

祭楊志仁少司寇

惟公儲祥越水載德關西二書並起二使與齊掀揭高竒
早收遇晚言階落郡一斥誰挽拔允宣滯連亞上卿基有
後命乃虧其成昔在同官吾汝方格其間猷爲不爽一墨
嗚呼公已矣矣文懿在天公侍而遊下土茫茫木斷山秋
嗚呼哀哉尚饗

祭周翠渠

維公卓識偉才人豪夫挺執取記聞曰有要領資深輔博
蠹簡陳編靜思瞑索以日以年畜久而泓出有餘用海立
星回文得機綜若昔前聞艾軒後村超契終詣有本有文
兩翁桓桓勇絕誰繼公鼓而前振汛揚厲支詞詭說由意
折衷竒正互出壯夫之雄鳥倦雲還脫蓑一面猶取校讐
皓首筆硯白雲誰和誤引同聲相逐雲龍四方以征昨歲
之夕歸休有夢豈曰其然斯文之痛茲夏之孟壺山其類
鄉國共疑繫公其歸嗚呼公可謂全矣謂命維八謂壽維
九謂學有後承委盡胡有嗚呼哀哉尚饗

祭澹軒弟

正德戊寅八月十九吾弟澹軒待學既晚食頃而卒中證
甚竒及亥氣絕嗚呼痛裂矣前一日約汝雲庄自隨辭夜
四鼓報至亟回比中道得訃嗚呼痛裂矣六十年兄弟幽
明俄頃入門浴櫛易衣矣嗚呼痛裂矣前六月待受死今
汝又死二兄一弟能久存耶嗚呼痛裂矣汝未有子猶幸
有遺腹意天之意也予立遴爲汝後以主汝喪汝子生與
遴兄弟相依以立忍淚爲文與三兄五弟諸姪設奠與汝
長別嗚呼已矣矣痛裂矣汝有至性順事吾父兄家之蠱
皆汝獨任義之舉皆汝相成焉出入深林長谷觸突猛噬

無苦也渾永鄭定遇事若宿構徐出一言而決斷不失和
處踈戚賤良有恩意樸約寡與成有家公府無汝之面人
不知吾弟也要門子姓無復賢汝者惟嗣事循襲未即如
教有此倉卒然汝兄在可瞑目矣嗚呼痛裂矣我望汝送
我顧送汝耶意長言短心腸如割不可以書矣嗚呼是訣
矣痛裂矣饗之哉

祭山齋母林太安人

維靈柔嘉維則幾穎内含言歸蒲坂于水之南儷德食貧
城是三徙力不遺餘健夫是似二雛孕淑叔也麟皇門戶
有赫不顯其光郎銜使秩封章
詔命望九真遠目酬

心應某忝令子徐郭心期生芻一奠黑風辛悲嗚呼哀哉
尚饗

祭張羅峰都憲

惟公渾完內植晶彩外彰蚤收甲第遂試星郎隱發機投
事若宿構崇城言言邑險誰右豸衣象簡攬轡澄清提封
千里于我溫陵尹寺移權解綬東去木高風搖旣乃終遇
明州載守聲烈無前大叅斯擢中丞繼遷南征壯猷召虎
是似奏膚三錫
天子之賜東南財賦經度自公利孔
搜剔乃陳乃紅
帝曰勞臣若金汝礪宸注垂勤一疾
短世交遊氣義千里如期設位緘辭倍昔以悲嗚呼哀哉

尚饗

祭方與義

老友見素林 謹因族子有祿郡丞之便附祭于故友瓊
郡郡伯桐城方公之靈曰嗚呼維公神清鬯朗穎厚所鍾
柔彼金石角其蛟龍釁起言階黨人斯籍帝諒貞臣竟薄
其責尋尹劇邑載刺大州聲先實副風宣惠流帝曰珠崖
汝其予守小決大聞無取牽揉水寒玉潔晨夜在公擾馴
訓敕仁及兒童乃服誰舍乃春斯輟陸絕水斷斯月何月
素車繫戀言赴無期一尊旣奠老泪交頤嗚呼哀哉尚饗

祭泉山翁

惟公道槩裕穠機神淵穎一落其芒不有畦畛詞林養望
粹質完聲青宮柄受司成二卿乃長銓衡乃司留鑰豈曰
北門自陝之托四星踰次貝錦聿興于樊于榛于彼青蠅
天開日明言諒忠愫峻秩其還冥飛奚慕瀆濱風月杜曲
桑麻皓首述作其書滿家笋出蘭立甲科四世青緋繞環
膝無餘地貞松古栢秋水精神考德問政晝乏停賓複席
繼燭言歌擊缶聯絡緘題猶筆無苟川岳淑厚繫公其專
穹階上壽福極無前山立依然斗瞻非故惻雨鬱雲素車
往路臨文飲泣迸涕交頤夷清惠和世風則醜嗚呼哀哉
尚饗

祭楊都憲母

惟靈玉雪其質金石之精柔儀正色體素含貞梅實未仁
鸞影孤照遺娠茫茫形影相吊凱風寒泉有美共姜于彼
柏舟于建之陽惟時艱貞神理所右任咸之妻永叔之母
天壽奇節篤生大夫續戎元弼嶽降之符晉國出總贛君
徵入母殯在堂斯夕何夕曰有命典曰有卹章兩璧斯合
玄扃世長子烏啞啞寒猿幽咽青霜長松千古斯烈嗚呼
哀哉尚饗

祭鄭直甫

正德庚辰四月乙丑歸司徒主敬姻友鄭君方湖之視予

走吊已遡游仙溪夫不及撫棺以哭憐視其未晬幼孤悵
然自失亦悲以疾矣八日癸酉乃強成文遣子適詣几筵
職其莫事告之曰嗚呼屏山在仙寔惟崑崙乘時應會乃
生東園維岳其神維帝其祉爲漢上卿爲周內史隆遇躋
極方湖載光是父是子于興破荒亮質閨性霽儀豁度鵬
鷲風塵驂駟道路材高晚售首白猶郎盤錯開鮮發矧于
將物化循環完福斯忌田荆一萎競爽二惠介也又弱慘
慄奚堪日斜鵬舍輶車載南山有遺鍾善有遺積後之歲
年梧竹森立走吊相失老泪如傾一尊遣奠特百常情嗚
呼哀哉尚饗

祭章楓山

嘉靖紀年二月又十日丁酉見素子 過我老友楓山翁
先生之門哭而告曰嗚呼道有界畛時有機綜鳳衰麟踣
飛走吟弄居醇守樸吾道不孤柴桑六格易洞門徒一代
完人兩間正氣立懦廉頑大雅風味白首時化彷徨艱貞
言屬世責當奸人構亂公對人幸遇 聖明存問疊稠
斯生斯日既老既病收焉以寂歲陰殘燭弱子拜前寒落
可念悠悠蒼天昔也何來今也如夢一老不憖遺典刑之
慟

祭孫德成宗伯

正德己卯六月寧庶人叛江西都御史孫公一川死之七
月寧擒又明年 新天子嘉靖更元贈資德大夫正治

上卿禮部尚書賜葬祭錄其二子祀之洪城友人見素子
林俊道杭具香帛酒饌遙祭焉嗚呼自古亂賊之雄盜竊
神器必陰嫉所不可制之人故始爲緩謀中爲種禍而終
則甘心焉意恃此以風驅雷迅鼓之而無前曾不知鬼禍
其盈天助者順徒足激忠憤壯剛志使我衆如虎彼賊如
鼠喪首斂氣滅其無日矣賊既賊公容知擒賊以償公者
固公鄉人耶斯天意也公神不死萬古一公而賊灰逗揚
使販兒弱子唾轡車而甘賊肉者所至如市一再歲正典

刑焉死顧公榮敗亦無賊之辱矣方是時旣賊之餌右賊以遏公奏緩賊之討以貿易神器者生如公死耶 聖人出世公烈益彰所以贈公葬公祭公祀公而錄公之後者存及嗣至謚亦尋舉焉俊氣義公同首觸賊怒天幸卒不死而公死焉斯所以義公慟公言切意詳歲月遷改于斯斯莫其有待矣嗚呼哀矣哉尚饗

見素集卷之二十七

見素集卷之二十八

後學黃佐校正
孫男及祖重梓

題跋 雜著

跋存齋稿後

予嘗恠賈生王通李觀諸賢不及見其至有私恨焉天地間不賢者何限賢者顧天以死謂天誠無意是人其未可知也今觀進士王公彥恭有感矣公在諸生以氣節勲業自効詩古文駸駸穎出聲震業光名流推讓假之壽其轟烈俊偉與世相無窮無疑也而僅與顏齊壽幾于郊之窮

得一第而不沾一命又弗逮乎詹以死然其道已信于友
售于時其遺稿已克傳于家其孫啓已世先業有古行爲
名御史嗚呼古今人壽者何限荒榛斷莽漸盡而無余者
亦多矣其諸爲壽不在天不天也

題五賢遺像

予從二泉邵先生始得拜觀諸葛武侯陸忠宣司馬文正
范文正韓忠憲公像畫史杜瑾所圖也五賢傳志詳焉李
閣老西涯翁摘其要分錄于左揔跋之盡矣予獨慨賢才
之遇之難也奉天蒙難聽贊旣追仇盡言逐如棄梗德宗
時也韓范同時柄用中外跂想其勲烈而群小不悅毀言

日聞竟罷竟請外司馬爲相已病天下共惜之予謂司馬
不死相亦不終熙豐諸人固在也武侯三顧而起佐帝胄
圖恢復專不失禮行君事而國人不疑炎祚幾熱而將星
隕非天歟二泉托志忠雅識邃而養充天惟純佑 聖
天子興理唐虞之時終其遇而不患不盡其用其在茲歟

恩命錄後志

上世有門蔭例明堂郊祀等恩有冊授制授勅授贈封之
典故甲族顯融無間綸書玉語複疊而駢蕃 國朝大臣
三品而上錄子官 旨授在內三年成績得封五品而
上與誥下與勅一品三代二品三品二代四品而下一代

八品九品本身進之路狹故並美少錫之難故寶藏爲特重上宰泉山先生今錄俊得拜觀焉先生尊府撫州贈上宰公而下祖孫父子三世第進士前後荷褒寵

誥十

七道

勅八道祖若妣六道父若妣八道先生若配九

道子主事君庭榻若配二道林世稱德門毓和凝祉至先生尤盛問學淵委識邃而養克休休焉至方若圓至勇若怯温煥若可親而居中栗不可柔知先生者容亦淺之知先生也廣平介而狹萊公大而疏先生兼其美而會其迹泯然者也先生在司成久上念之一歲三轉官識者猶以爲當朝夕贊

天子紆廟謨張主國是留都位置非官

宜夫人論至公也抑德必世世盛恒理耳安世之賢人莫竟其說仁桀再世有莫知天道之所以然先生作述無愧焉

恩命稠疊非倖致而然錄之昭

上貺也揚世

美也迂續來休有隱望焉

題陳一夔太守像贊後

右大司寇盱江何公所作陳高州西潭像贊西潭粹雅精博頽然一儒者平生制作尤盛於詩可傳示後世無疑者盱江贊不及蓋舉其重言耳盱江與吾鄉從吾彭公並擅時名而量稍異從吾博大盱江方整不當其意不少假顏色蒞屬尤嚴獨於西潭體貌若此視其贊可以知西潭矣

三復起敬謹識其後歸之

題朱二守送行卷後

莆郡稱文獻蒞郡宿多鉅公近時尤楚楚可尚或曰守南郭王公賢也故寅貳皆賢予曰固也朱君士容先南郭郡丞者踰年有孝子劉閔者君首詣之延教社子弟分月餼以給其母有巨盜江者任俠樹黨殆不可圖君擒殪之植良艾奸政之大無踰此君蓋自得之南郭慎許可序文獨致重公其亦有所試矣

跋張東海小草千文

成化間張汝弼東海邵文敬半江蕭文明海釣皆以草書名半江海釣皆自謂當北面東海一時學書群宗焉東海天趣逸發筆力豪宕其大幅尤佳小書未盡其妙也詩信筆可傳播偉然一代人豪爲時宰所忌僅知南安吳僉憲出示此卷展玩之餘謹附于左

跋夏太守育才家譜後

遷史記大夫世家譜之作昉此宋歐蘓譜率爲士夫所宗吉之隴州夏氏譜又參互而廣加詳焉斷自虢州爲世缺所不可知蓋不可妄附以失本實此公敬甫諸君子脩譜之意今延平郡伯育才公訂成者也譜傳所載文莊公而下凡如干人圖系無聞者亦間有焉嗚呼崇韜拜令公之

墓識者譏之蔡京之裔不敢目其祖直附忠惠譜雖系世
次子孫亦可感而興焉郡伯公廉實忠恕有時譽今公忠
惠夙有志者俟其成績焉

菊跋

菊之華五色獨以黃稱韓魏公謂黃華晚節意凡菊皆然
非獨黃也公本月令者也秋之季月菊有黃華菊黃爲多
從多而論抑秋金也金之品黃爲上季月土也土正色爲
黃菊木屬而具是二行從其上從其正以黃稱歟未可臆
爲之說是賦一素一冊又莫知其指豈以寄耶素其質而
冊其中耶抑適情立象因而賦之不可知不可知然竊慨

焉霜風搖落是菊以孱然數尺之榦與剛貞之梅後先以
承晚匱亦難矣

跋李西涯墨蹟

成化間李西涯以文翰擅聲翰林吳匏翁稍後出與並蘓
長公稱書象人形歐陽率更貌寒書徑刻正如其貌予謂
文亦然涯翁澄潤故文極清永書晉法也匏翁雅醇故文
極渾重書蘓體也皆逼真者評者謂逸少東坡書皆晚年
後工二翁弘治間書精爽尤不可及涯翁是書其龍駒鳳
雛初年時也已自如此門下士林俊謹題

題淳熙贈黃知稼告身

右宋 孝廟郊祀恩贈通直郎黃沃故父尚書考功員外郎致仕公度爲朝奉大夫者也先是左丞相虞允文罷鎮蜀死右丞相梁克家曾懷葉衡相繼罷故闕龔茂良淳熙元年十一月李彥穎二年閏月俱叅知政事三年十一月赦恩四年四月告下故具名六月龔爲曾覲黨謝廓然所劾責放英州矣朝奉公號知稼黃旗樹屋應夢而生譙樓紫氣公遂大魁天下陳正獻公魁亞龔年十四在榜中紹興戊午也公獨位不過郎甫在宋五狀頭徐官至尚書陳鄭登二府吳大理少卿亦惟公位獨下然不濡跡姦檜完名純節正獻公相頡頏諸公間有慚色士之顯當時而名後世其果區區爵位之赫然者哉公裔孫廷宣鮮元世護舊物襲新綺而加池潢之捧以詣其舅氏俊公裔孫甥也盥手披閱志于左方

李長者誥勅跋

李長者宏封侯賜額 誥勅理宗景定所予似道首相

街名在焉按秦壞溝洫而水利興然皆有司之事熙寧初安石導神宗興利始詔諸路勸誘脩陂塘圩隄議功旌寵長者起民間有事木蘭是詔也當時蘓軾所論劉摯等所䟽程昉等之淤田利殆不勝其害獨長者陸海百里與離堆鉗盧相無窮故樂道之因附安石高竒起事爲宋擾之

始又惡夫似道之相宋無日矣

雜著

鸚鵡翡翠解

滇之西多鸚鵡群千百以飛啄松子林頃之且盡土之夷
腊之執彈而臨之應弦下以死其一嘴爪如丹毛五采錦
以絢夷求生致之羅四面數日乃得得則架而懸之飼以
穀若黍而通之語言以購重直即翡翠者陷以機矰繳中
則利其羽而肉棄之因感莊生鳴鴈韓子二鳥之篇而重
太息焉彼均羽毛之異而壽夭殊者其用異也易之則亦
云爾宰物者之爲翠累亦誠悲歟抑固材而死也鵠胡爲

耶食人食言人言以墮誤人事生亦良贅矣

舟神紀

蕭晏公者名善水江之舟多祀焉昕夕撞鼓磬爲樂發必
告止必報牙日必祭風雨盜竊現恠物必禱焉舟人窮寧
死不復神恡一進止失據市酒實甌肉實盆拳跽蒲伏道
罪過縷縷以紓神怒成化甲辰予謫姚州倅附客舟泝洞
庭目感且褻心厭之一日颿遇風疾駛柁師弛柁職罔共
舟觸灘狝突撼頓益膠弗可解棹數艦俱絕予謂登若貨
器勢易與弗能從也夜虞盜寘道里費神間逆盜懼弗檢
也再信衆如予言果脫走謝神予適往收費衆誤爲禱也

曰公舉辦香如響因以謝予予不顯爲辨嗚呼情而膠輕而解人則云然神奚怒奚功也亦豈辦香能喜况未必然耶有大于是者得予言而從之庶幾乎其無惑以理矣

鼠雀對

有高其倉而儲者群鼠下食之不得上飽以暍死其一困猶生守倉奴得之四足而釘之執細荆而詰之鼠瞋目短氣死復蘓首若自服口唧唧若伸辯狀鄰叟善滑稽詒奴曰吾能通禽獸言鼠有所訴奴曰何訴曰鼠亦毛而族耳馬牛犬豕以其用也食主人之食鼠賤生無所用亦天地間具物耳耳目口鼻何異馬牛犬豕饑食渴飲爲欲同情

也主人不憐而與食盜而食爲辱亦甚矣以微命博一飽暍死肩並主人不相憫而相罪多見其忍也夫雀翼而飛百什而群鬼入而神出耗主人之食亦衆矣又惡得而詰之奴停鼠羅雀執如鼠而毒焉雀陽死嗚悲叟曰亦有所訴曰雀驚鴈而族耳肉不登俎豆其無用同其具物天地又同饑食而渴飲有間哉鼠奚知鼠而不知雀也雀可死鼠亦可死獨雀死乎哉鼠曰吾之群無汝之多疾飛遠逃無汝之便雀曰吾棘棲而野食不得已而食主人之食入其羅主人之子籠閣粒飼撫而愛之有愛汝者乎冗墉穿牖破衾敞帷喫紙浣書翻盆倒盎使主人食常廢匙卧不

貼床席吾盜雖多其取厭顧出汝之下鼠奚雀之連鼠則
語塞雀曰無憂吾汝之腸費亦良甚矣奴亦以用而食主
人之食飲口撐腸刺齒捧腹携挈群侶倒卧林樾而屋頽
弗支垣敗罔飾畦蔬墾禾荒死枕籍然猶異菓先嘗嫩雛
潛炙削分隱錢匿丈謾石以私其身圖而肥厚其妻子耗
主人無鼠雀倍耶奴嚼齒髮指臨之甚威既而思曰吾過
矣遂釋雀與鼠澡身浴德窮智役力先主人憂而忘其妻
子之急寒不知衣飢不知食出入戴星風雨不得息不再
歲屋堊如新垣補就密桑梓屯雲稷稼蔽日菜闢庾陳主
慰家實專倚隆毗群奴莫加焉方悔雀言之晚揖隣叟而

謝之叟曰是詒也吾借以風耳夫吏于公者皆奴也胥史
廝役皆雀也盜鼠也盜之害下於胥史廝役而取厭于吏
盜尤甚治盜而不先胥史廝役蔽也不自治其身又何治
於胥史廝役哉奴曰甚善書以爲吏告

馴虎解

廬墓孝子之自致非常也售僞者往往舉馴虎與白鳥甘
露爲例以爲孝徵夫昭昭人耳目事猶假自文如近世元
臣白鳩白鴈舉朝有詩可盡信乎抑爲誣猶近也虎遶屋
越垣卧廬側容有之容知其馴耶手而撫之搖尾帖耳如
犬之服習投之食張口而授耶制虎醫虎虎服罪志恠者

也渡河之對抑誠偶然者周公聖人也驅虎豹而遠之何彼勞而此之逸也近虎爲莆患一捕獲之二虎又爲患又連捕獲之朝令而夕竒應何神也記成化時虎亦爲患懸重賞致之連獲三十虎噬者不獲二年乃獲又何其滯也所謂偶然者無信耶噫斯生人之幸不幸也曰然則紀之者誠神其誣耶曰信及豚魚是類也以立教也不紀無以勸化不紀無以勸孝君子寧受人之誣而不忍絕人子自致其親之善

郭巨辯

巨埋兒有諸曰慈孝一道也世無虧慈而能孝者參養哲每食必問所與與孫尤人情母愛之矣啖所愛非順也况忍之遠之已過矣况埋之耶母繼有孫之間欺可乎告之可乎難爲巨之詞矣使母痛其孫以吾故恨死悲巨貧不食死難爲巨之書矣春秋以趙盾正卿不討賊書弑巨弑母矣母固無恙巨不得厚孝以絕父子之倫矧無後亦禮所謂不孝脊失之矣殺子事君殺子事母歸一也巨與鄧攸事頗類議者不以右攸則不得右巨矣曰然則何以紀曰巨孝有之得金容亦有之掘地非埋兒也曰然則冊書足信乎曰尤無謂好事者將神巨於孝不知說之邪陷巨於惡教天下蔑倫巨始也作郭巨辯

毒虎解

游洋縣萬山中竟以虎廢食土之毛者利之猶時阨于虎
 若未之蛇然無能易者也正德戊寅虎乳二子益酷閃形
 貿跡風至而鬼藏率徙踰一舍獵師至無所覓山落嗣以
 虎告獵師至復無所覓居人患之約蓄信毒虎虎一日噬
 蔡氏僕主率鄉之人逐之虎釋僕去已數肉虎口矣以為
 廢物遂議啖虎以特脫鄉禍剖其肉實信寘釋所虎食之
 盡果死或言二子亦死意未然也後數月無虎患人功蔡
 氏予曰虎之毒善夫非處僕也僕固賤人耳非牛羊豕例
 也人不幸食於虎瘞其餘猶足一慰奚至割肉而盡委之

虎耶嗚呼何斯人之重不幸耶曰然則毒虎非歟曰牛羊
 豕則是人則非虎之死有自忍亦有屬矣作毒虎解

侯軒解

侯侯之也易履之九二曰履道坦坦幽人貞吉上九曰視
 履考祥其旋元吉皆泰之地故繼之以泰君子行法居易
 以侯天也德成君用之學至君求之我無預也而命之天
 者自至有侯之象焉故曰侯聖賢立言垂範以善導民而
 不欲利誘之斯意也其不然固有侯而得而不得亦恒多
 矣藝侯獲而食也而未必得食侯蚕而衣而未必得衣侯
 之身有終於不遇侯之子孫有終於索然而不自振命有

定有不定也有定而無不定其在我歟故曰學者爲己俾
利計功淺乎其所尚也夫德俟其日新學焉俟其日益以
造高明正大之域得則喜不得則惕惕然以悲懼來者之
無多而光陰過鳥之不足恃俟之至也姻友陳君玉光先
侍御居易公佳子居易公俟之身不獲矣俟之後之人叔
氏郡伯石峰君副之矣君又副之說者擬之二方夫得之
在我而又得之在天得所俟者作俟軒解

泣麟解

馬圖龜書文明之符也夫靈氣之鍾人與物共之伏羲神
禹執其機馬龜宜其應感聖人之時爲聖人出也周之時

鳳鳴岐山矣而文王繫卦周公繫爻辭河圖大昌武王訪
道得洪範而洛書載顯吾夫子何時也姬德衰賢聖之君
不復作世網人紀蕩蝕無餘在圖爲否爲剝書咎徵六極
時也夫子猶有望夫行之端鳳至圖出深有異而不符周
公之夢遂絕矣由是假行事於魯史以脩春秋以言誅亂
賊而正王法授爲邦之意於顏子重其寄於淵也而擎天
未力一臂先失淵蚤死人之麟先踣矣麟胡爲乎來哉胡
爲而不踣以斃于鉏商之手哉人靈於物聖人靈於麟夫
子畏於匡伐木削迹於宋於衛厄於陳蔡盜蹠幾不脫虎
口者屢矣麟胡爲而不殆楚狂知鳳之衰夫子必知麟之

非其時及禍哭麟哭回也傷道以自傷也始感麟而生終感麟之斃以絕均不遇也抑夫子素王也麟感素王之時爲素王出而文成方至與韶成致鳳無異夫子賢於堯舜麟何亞於龍馬神龜五時之祀出而改元麟雖遇何指哉

木蘭閒劇

木蘭病夫今之恠民也畫史鄭玉濬圖其像陳黃門方壺樹石之人與境備矣見素子素知之素忘之也詰而語之病夫何泮渙爾濩落竒崛如是邪儲汝精範汝形館汝過客溷一駿於深售與二鳥之光榮籠囚羅致弗樂也白駒皎皎孤鴻冥冥而任而真素鷗野鶴海上之風雲繡峪蒼

崖山間之月日挂索抱甕草衣木食局下氣高心長步窄孤請劔於百懷與舉楹之一力填海奚情集木若失在當時表著敢歷一堦若叙述數君子又悲夫無徑之可入繆嘗學埋輪倣運甍憂係希文病竊君實可望焉不可至也雪壑徃夢烟丘疇疾陰風晝寒使我心惻慨吳尊以孤徃撫陶松而自適何望乎潁水箇瓢東山兩屐已矣乎病夫朝菌露槿是人也月榻雲龕卧隱少室神遊東所意徃方石奉時化以周旋與身命而俱畢病夫曰是何有于是吾忘我矣

題以吉卷

吾家御史中丞兄季子以吉御史學古道陽明子既告之
 矣因屬就正於予予耄懶茫乎無得也然樂善予性也况
 鄉耶况同林氏耶况中丞予道義友莫逆無異兄弟固予
 視而愛之學古道固幸而輔掖之矣夫古故也已然之迹
 也善樂者必按譜屈伸俯仰綴兆舒疾惟所用之善鑿者
 必按方表裏虛實升降補瀉惟所用之故樂節而藥用神
 師曠秦緩其無能易也夫聖者視天為至也故曰聖同天
 賢者視聖人為至也故曰乃所願則學孔子未至於賢又
 以賢為至也故曰學顏子之所學躡而求君子之所病也
 道至孟子而著至朱子而又著希聲絕響超見獨識意領

而神會若是其難也朱子鄉先進也以吉以朱子為至朱
 子學焉吾家江陵邵州忠義之祖也嗣先嗣宗又孝義之
 祖也以吉以祖為至其假外求哉昔張魏公巍然物望教
 南軒以仁義忠孝古聖賢自期其後南軒友朱子博約詣
 妙遂厠道學之傳中丞諸子於以吉尤奇愛其教以吉當
 不異魏公不知相博約有如朱子否也夫無其人有其書
 有其心焉耳夫人則固在也速効銳進中道而止與偏而
 整事君子者弗由也吾於以吉隱乎哉語以吉語達也

聯桂族範

凡林子孫父慈子孝兄友弟恭夫正婦順內外有別尊幼

有序禮義廉耻兼脩四維士農工商各守一業氣必正心
必厚事必公用必儉學必勤動必端言必謹事君必忠敬
居官必廉慎鄉里必和平人非善不交物非義不取毋近
聲色毋溺貨利母親喪不葬細行不謹毋信婦言傷骨肉
毋言人過長薄風毋忌嫉賢能傷人害物毋出入公府管
私召怨毋奸盜刁詐飲博鬪訟毋壞名喪節災已辱先善
者嘉之貧難死喪病疾周恤之不善者勸誨之不改與衆
棄之不許入祠以共綿詩禮仁厚之澤敬之戒之毋忽

家範

吾林子孫父慈子孝兄友弟恭夫義婦順内外有別長幼

有序嫡妾有分子弟有學貧難相救昏喪相助各治一業
毋干外事毋好遊逸毋學賭博毋近聲色毋涉勢利毋信
婦言毋及人過立志必希文爲學必仲晦居官必闕道處
鄉黨必彥方自期婦女必貞潔必勤儉必絕淫妬臣不事
二君女不嫁二夫以共綿忠孝之澤敬之戒之毋忽

跋孝友堂卷

族弟賢卿稱孤時髮未總身無所棲無所恃爲衣食力學
以基母養以均飽其二兄令而歸僅市小屋磽确田數畝
合群從食之夫孝友植綱常而匡世化者也重所由出固
也又重所同出難賢卿之境又難也古者子弟分以業而

身素集卷之三十一
責成功時其入而量出之故可繼可久緝貞規垂令式五世十世百世可也

孝友堂跋

李贊皇疲一生於平泉草木之間其遺戒有壞一草一木者非吾子孫不知草木之不壞所以速李氏之壞也予素不畜奇物安取敝敝然護植之勞與觀者之酬應哉善立家者孝友維屬數百年呂榮公崔山南兄弟子孫之盛可槩也贊皇移戒于是安有洛陽有力與梨園別墅之取者哉詩曰謀之不臧則用是違吾閩憲使寧川周公公儀堂名孝友取三家家法爲維屬地者噫得所貽矣

懷諸老二十六詩小引

正德癸酉端月二十又四日華亭定庵曹先生夢俊以玉盃及編次國朝典章合五經者一帙遺先生覺而報曾孫生先生詩志喜錄以遺俊正德丙子夏也先生詩素名筆精入妙人品又素高八十五歲人辦此三絕尤世獨見持示子姪傳觀之至不可問冬之季始還寘架間得之甚幸時久不作詩未敢擬和挾遊木蘭偶和得助喜二詩又得壽先生二詩又得壽邃庵楊先生二詩暮歸又惟近時林下大老深相知與跡踈味合承相念者謝先生方石張先生介庵劉先生東山儲先生殖庵皆已古人而山斗巋

然可望不可即者未能已尚慕離合之盛積數日又得奉
懷木齋謝先生守溪王先生楓山章先生洪洞韓先生休
齋沈先生九峰孫先生二泉邵先生絅齋戴先生西泉曹
先生與自述各二詩用道遙臆與吾衰之感而詞氣蕪索
重學落之悲名德素心今皆安在哉是月五日燈下某志

鄉飲酒跋

養老虞夏已然鄉飲酒義周備矣所以免於人禍也政教
之本也仁義接者也明尊長養老也故民知敬讓孝弟立
而國家安聖人制之孔子曰吾觀於鄉知王道易易也漢
鄉三老者在令甲逮顯宗始勤臨雍之拜我 聖祖德

音渙頒守臣祗服焉禮讓爲國乎何有近惟故事殆不足
訓矣

題宋太祖擊毬圖

此陳董學峰湖家藏宋宮中本也元錢舜舉得而臨之其
筆勢圓熟神氣飛動爲畫家獨品宋太祖太宗而下人誌
之第不書何時事意未稱帝時也君臣同遊故不若是褻
守信昭輔進固武流普謀國元臣與主對鞠失君臣體太
宗觀鞠體亦非是責善父子難帝固英明主也自馬蹶悔
獵言固易聽重以普帝所重耶昔韓退之諫張僕射擊毬
以人馬勞佚壽夭爲喻唐僖宗自謂擊毬狀元優人石野

見素集卷之二十八
猪曰恐堯舜爲禮部不免駭放普無愧退之無愧優人耶
爲責備惜之

題邃翁贈幸庵卷

少傅楊邃庵公起神童壯猷茂學宿德鴻聲功華夷而表
儀朝著幾先孤舉今 天子虛懷以待 爾書存問使
相屬卜泰平起公屢屢焉公厚吳文定公劉忠宣公李文
正公允道義許與者也公贈彭幸庵翁詩西涯去後誰知
已南有素翁北幸庵翁精忠駿節舊德元功予不誠類也
然亦繆公知己贈予詩有古道百年君與我之句昔昌黎
友東野予東野爲類君實之於景仁翁殆景仁過之抑郭
有道河南友李元禮汝南友黃叔度吾夫子友子產於鄭
於衛友蘧伯玉有道邃庵未甘北面而尤於夫子願學也
吾二人四子何居謹幸庵翁請質焉

跋趙松雪柴桑書畫

陶靖節先生白描小影凡十四書事跡如之相傳元趙文
敏公手作李龍眠本也畫格書品筆勢圓熟要非文敏不
能近世士夫家徃徃得之是本貳司寇吾友顏公梅田襲
藏本也或疑畫本之多要非真本予謂政不必真也二公
底裏故異文敏對靖節寧無愧容敢附手墨以備書前懿
繪處士逸像如此者謂無一真亦可也

盡我箴

族子以吉乞告歸復起爲御史來求言作盡我箴
與達與輅誦之

形化散殊萬彙一我我具天地參焉維可御氣圉情坊心
繕性廣厚高明仁義中正脩辭立誠窮理盡敬博約會通
慎密鎮靜體生者德任道者身臨深履薄若對神明維實
維有歎焉若虛我恒不足人若有餘母曰人畏曷先畏已
澡刷彌縫緝熙敬止母曰責人而忘自責謫處陰籌醜好
奚擇我盡吾我稱物平施如度之度如衡之持我盡吾我
乾健坤順日進無疆動益以巽我盡吾我貞固弗貳素位

而行夷險一致我盡吾我人維我先不我者天任其自然

阜俗三義

巡撫都御史林 爲阜俗事竊惟王政之大養生復性送
死而已然官府事泛難於徧施鄉曲情親易以時叩預備
有倉未足應朝夕之求郡邑有學未足周鄉閭之化近關
有漏澤未足使偏村下聚各歸於其土今立三義示爾齊
民胥勸互成裨我官政表厥之典三全具錄一盡特書幸
毋自沮以鼓舞大化會歸我 皇之極

盡一義者官爲
扁一義之門二

義三義稱是社無富家
數戶朋舉扁曰義社

一義倉照得江西預備雖設事頗具文常平甫基官乏糴

本足應緩急尤屬義倉其割羨餘置別庾六百石四百石
量力而爲一斗息二斗息視貧而定使同社絕生塵之釜
均舉火之家不償者不借既死者量免倘樂備千石尤利
博一鄉庶社倉祖仲晦之謀不勞官本義倉溥九韶之惠
可厚民風善無不報義在必行

一義學照得江西家攻儒業尚阻困窮囊澁學金竟安愚
賤懋建義學賴爾社人其延學行名師訓誨子弟館資師
贄專出本家口授經承泛及同社使貧家有育才之幸無
學課之憂學成資以儒服進于官庠倘師專較利則主另
擇明庶劉允迪義學嗣爾古風萬石君義門允多名士世

間好事毋讓人爲

一義塚照得江西風水賈禍拘忌停喪佛法流誣循習火
葬仁及枯骨義塚是圍城居者量市近郊鄉聚者相觀平
阜擴數畝便地惠合社貧民序列深葬表志氏名使生得
近隣死得近穴倘仍助棺之費益加積善之基庶陳向漏
澤裨葬朽之周文危禎義塚贊掩骼之呂令天惟佑德里
是稱仁

禁約民害

巡撫都御史林 爲禁約民害事訪得江西商民輻輳軍
校淆雜有等光棍喇唬專一生事害人如蓼州等處牙行

經紀結黨合群得過者把持行市故阻客貨賤攬而貴賣
名曰屯船貧難者哄弄孤客故尋事端掇籌而混貨名曰
簽大會串同舖家瞞騙客錢名曰打夾帳傾銀匠上梅刮
錫名曰畫絲抵搭沉鉛灌銅名曰包皮吊角校尉強買貨
物包取腳錢把持河岸名曰把頭軍快指以巡邏私通盜
賊詐害平人名曰綽露水在途爭鬪群兇助打名曰傍不
忿提買貨物抵換原銀名曰撮包子秤尾抹膠黏帶碎銀
名曰黏乾鵲舖行船家糶賣米穀手剎斗斛名曰打雞窩
私結盜賊賤買贓物名曰接短頭遭風失火搶搬財物名
曰趁開打劫指稱衙門誑詐名曰撞太歲停住囚犯打點

名曰穿珠眼白身衙門營求勾當名曰野牢子跟隨坊甲
下鄉提人名曰送喪吏農承差身死而弟姪頂冒名曰茅
鬼問革而隱匿復克名曰還魂書手久戀衙門掌案作弊
名曰主文攬納官糧買米私賣乾籌名曰趁倉擅入府第
保債勒取信錢名曰領頭捏寫詞狀教唆索錢名曰掉筆
頭偽造印信詐撥吏農名曰假布政此等民害里長戶長
社長社正推奸不舉巡捕巡司總甲小甲容情不拿本合
通究緣循襲之有年恐自新之無路姑記禁約爲此示仰
前項惡徒俱要改過自新本等生理應首官者首官改正
敢有仍蹈前非許巡捕巡司里長戶長社長社正總甲小



原件短缺

見素集卷之三十一
甲指實呈來從重問發敢有容隱通行追究使風俗還醇
奸僞無托若乘機挾仇報怨罪亦不私巡捕朔望具不致
縱容各民害甘結繳報湏至出給者

見素集卷之二十八終

少保公文集跋

先大父少保公敷歷

兩都忠事

四聖寓內高其節槩崇其文章公亦慎所與著作百有餘
卷諸叔少司馬省吾翁錄二十五卷梓于百粵太史
泰泉黃公嘗編校之嘉靖壬戌莆罹慘禍家遭兵燹
版籍蕩於烟塵士大夫過莆懇之莫應祖懼前光過
佚旁求舊本至榕城得之大司農鍾陽馬公所藏者
公嘆曰名碩之生代之多人莆稱文獻惟尊公為獨
盛生仰止舊矣讀其疏劾梁方引用僧繼曉則左道

身素集卷之二十一
者屏息抑寧藩府第易琉璃則逆萌者寢謀按權璫
私人李陽鳳于獄三封還

詔書追巨盜藍廷瑞據西蜀王武寇江右公單騎西入賊
壘宣德意而撫之忠貞激烈循國忘身芳名與日月
爭光勲業與天壤共敝矧文章山斗品藻寓勵世之
機豈瑤華玉振之是飾宜亟圖之祖歸梓諫草七卷
民部尚書卽希齋柯公校之難餘力詘而止

穆宗登極南省岑公少谷疏薦補大父

卹典祖承

恩澤授

端宮司簿

諸大老日索文稿祖抱隱憂及改

留都樞幕黽勉鋟梓以少逭罪愆憶嘉靖乙酉省吾翁
梓是集于穗城今祖成是集于白下歲之合符誠不
苟矣續集諸姪度支正卽大黼捐俸梓之惟詩集尚
缺異子姓宦遊者續成焉

萬曆乙酉季冬臘日孫男及祖頓首拜紀于洪樞公署

程